

အပိတပိတၵ်း

AWIG - AWIG

ၵမတအမတၵ်းပိတၵ်းမတၵ်း

DESA ADAT SEMBUNG SOBANGAN



ၵမတပိတၵ်း

DESA SEMBUNG

ခိမတမတၵ်းပိတၵ်းမတၵ်း

KECAMATAN MENGWI, KABUPATEN BADUNG

ၵမတၵ်း

2012

BANTANG AWIG-AWIG DESA ADAT SEMBUNG SOBANGAN

MURDDHA CITTA	1
SARGAH PERTAMA ARAN LAN WEWIDANGAN DESA	2
SARGAH KALIH PAMIKUKUH LAN PATITIS.....	2
SARGAH TIGA SUKERTA TATA PAKRAMAN	4
Palet 1 Indik Krama	4
Palet 2 Indik Parajuru lan Dulu Désa	9
Palet 3 Indik Kukul	14
Palet 4 Indik Paruman	16
Palet 5 Indik Druwén Désa	18
SARGAH PAT SUKERTA TATA AGAMA	18
Palet 1 Indik Déwa Yadnya	18
Palet 2 Indik Resi Yadnya	24
Palet 3 Indik Pitra Yadnya	26
Palet 4 Indik Manusa Yadnya	30
Palet 5 Indik Bhuta Yadnya	31
SARGAH LIMA SUKERTA TATA PAWONGAN	35
Palet 1 Indik Pawiwahan	35
Palet 2 Indik Nyapihan	41
Palet 3 Indik Sentana	42

Palet 4 Indik Warisan	44
SARGAH NEM SUKERTA TATA PALEMAHAN.....	48
Palet 1 indik Dusta lan Bhaya	48
Palet 2 indik Karang, Tegal, lan Carik	49
Palet 3 Pepayonan	50
Palet 4 Wewalungan	52
Palet 5 Wewangunan	54
Palet 6 Indik Karesikan utawi Kabersihan	55
Palet 7 Panyanggra	55
Palet 8 Indik Tulung Sinulung	56
SARGAH PITU WICARA LAN PAMIDANDA	57
Palet 1 Indik Wicara	57
Palet 2 Indik Pamidanda	58
SARGAH KUTUS NGUWAH-UWUHIN AWIG-AWIG	61
SARGAH SIYA SAMÀPTA	62

Murdha Citta

OM Swastyastu Nama Siwa Buddhaya

Malarapan saking panghyangning kalih paswecan Ida Hyang Parama Kawi, pingkalih Ida Bhatara-Bhatari, asung kertha wara nugraha ngawentenang kahuripan sakala niskala, Bhuwana Alit lan Bhuwana Agung.

Sotaning bhuwana agung, desane wantah pawakan bhuwana maurip jangkep saha Tri Hita Karananya luwire :

- Ha. Parhyangan, sahananing kahyangan , panyiwian desa genah ngarcana Ida Hyang Parama Wisesa, pinaka atma desane.
- Na. Palemahan, tanah kakuwuban desa sinanggeh stula sariraning desane.
- Ca Pawongan, krama saha warga desa maka sami maka pawakan Tri Kaya, mawaning desane sida molah maprawerti.

Adung patemoning bhuwana kalih, malarapan Cantu Jagadhita, sinanggeh murdhaning prayojana pangriptaning awig-awig Desa Adat Sembung Sobangan. Maka ngastuti Bhukti mwanng Mukti, titiang sinamian saking Krama Desa Adat Sembung Sobangan, midabdab ngarajegang Awig-Awig sane kaanggehang ring wewengkon Krama Desa Adat Sembung Sobangan kadi ring sor puniki.

Om Siddhirastu.

SARGAH PERTAMA
ARAN LAN WEWIDANGAN DESA

Pawos 1

- (1) Desa Adat puniki mewasta Desa Adat Sembung Sobangan.
- (2) Jebar kakuwub wawidangan mewatas nyatur Desa:
 - Ha. Ring sisi wetan Desa Cau Belayu.
 - Na. Ring sisi kulon Desa Sembung.
 - Ca. Ring sisi Lor Desa Balangan.
 - Ra. Ring sisi Kidul Desa Sobangan.
- (3) Wawidangan Desa kaepah dados petang Banjar, luwire:
 - Ha. Banjar Pempatan.
 - Na. Banjar Tegal.
 - Ca. Banjar Dangin Bingin.
 - Ra. Banjar Anyar.

SARGAH KALIH
PAMIKUKUH LAN PATITIS

Powos 2

Desa Adat Sembung Sobangan puniki ngamanggehang pamikukuh luwire :

SARGAH TIGA
SUKERTA TATA PAKRAMAN

Palet 1

Indik Krama

Pawos 4

(1) Sahananing wong jenek sane ngagem pakarangan utawi malinggih ring pakarangan tur kaiket ring kahyangan tiga punika sinanggeh wong utawi krama Desa/Banjar Adat.

(2) Wong Desa/Banjar inucap manut linggihnia wenten kalih soroh.

Ha. Kulawarga sane magama Hindu tur ngeranjing nyungkemin utawi makrama Desa/Banjar, sinanggeh wong Desa/Banjar Adat Sembung Sobangan.

Na. Sajaba punika sinanggeh tamiu.

Pawos 5

(1) Kulawarga sane magama Hindu wiwitan saking warga Desa sewosan patut ngeranjing makrama Desa/Banjar Adat prade pacang jenek mapaumahan ring wewidangan utawi kakuwub Desa/Banjar Sembung Sobangan.

(2) Yan tan jenek paumahan mekadi ring ajeng wenang dados tamiu.

(3) Sang ngeranjing makrama Desa/Banjar sangkaning jenek mapaumahan utawi wiwit numpang.

- (4) Sulur miwah tata cara makrama Desa/Banjar utawi numpang manut pararem Desa/Banjar.

Pawos 6

- (1) Nyulurang tedun makrama miwah ngetangan, pawah-wuh sahananning ayahan luwire:

Ha. Ngawitin ngetang nangken Galungan majeng ring ayahan ngarep.

Na. Ngetang pramangkin majeng ring ayahan Balu.

- (2) Sahananing wusan makrama kaetang pramangkin.
- (3) Nangken ayahan panamayan inucap, Kelian Desa/Banjar patut ngawantunin nyacah jiwa, ngetangang miwah mastikayang, pekraman saha ayah ayahan kadi ring ajeng, ring pawidangan Desa/Banjar.
- (4) Pamastika cacah jiwa pamekas indik pakraman wiwah ayah ayahan kapikukuhin antuk pamutus paruman banjar kandugi prasida kamargiang.
- (5) Pamastika inucap digelis kasuratang ring likita(pipil) makrama.

Pawos 7

Wastan ayah ayahan luwire:

- (1) Sahanan warga desa/banjar sane sampun mayusa anom miwah daha soang-soang dados nedunin ayah, kawastanin ayah daha (sane) istri miwah ayah teruna sane laang.
- (2) Ayah - ayahan balu luwire :

Na. Rikala wenten pakaryan sane mabuat.

- (3) Desa/Banjar mapaweh laluputan ayah-ayah utawi pakenan-kenan ring sang inggilang linggih utawi kawelas asih, luwire:

Ha. Sor singgih laluputan miwah bacakan sang luput, kaungguhang ring pararem.

Na. Sajawaning prajuru desa/banjar sane pastika polih laluputan:

- 1) Para sadaka, makadi pemangku khayangan desa panyiwian lan panyadenia,
- 2) Para serati lan sutri,
- 3) Sang sungkan tahunan tan prasidha katambanin.
- 4) Wong cedangga banget,
- 5) Wong alit ubuh meme-bapa (ayah-rena).

Pawos 9

Swadharman warga desa/bonjar, luwire;

- (1) Sehanan warga desa/banjar, patut;

Ha. Dreda atuang ring desa/banjar.

Na. Tinut ring sedaging awig-awig, pararem miwah pasuara guru wisesa (sang mawarat).

Ca. Tan maren ngutsahayang mangda desa/banjar mrasidayang nyujur anut patitis ring ajeng,

Ra. Natak sapekertin desa/banjar.

(2) Wong desa/banjar sane manggeh, panumpang wiadin tamiu patut:

Ha. Tinut ring tatiwak desa/banjar ngupadi sukerta desa/banjar

Na. Tan wenten tungkas ring sapamargin kertin desa/banjar ring genahnia jumenek.

Pawos 10.

(1) Sahanan warga desa/banjar wenang polih pasayuban prajuru nganutin indik :

Ha. Sangaskaraning kauripan sane mabuat, sane mastikayang : iketan sulur pakulawargan.

Na. Kasucian miwah kasucian pawongan, parhyangan miwah karang paumahan soang-soang.

Ca. Kasukertan padruweyan soang-soang.

Ra. Kabawosin tur katiwakin pamutus sahanan wicarania.

(2) Sehanan wong desa/banjar sang sinanggeh tamiu wenang polih pasayuban ngemanggehang kasukertan raga, agama saha padruwenia soang-soang.

Pawos 11

Wusan makrama manut sulur kadi ring sor:

(1) Sinalih tunggil kulawarga wusan makrama desa/banjar prade:

Ha. Magingsir linggih saking wawidangan Desa Sembung Sobangan kadulurin nunas panugrahan ring prajuru.

Na. Wit piwal ring awig-awig utawi pararem desa/banjar, saha tan tinut ring pituduh prajuru indik nyuparaga ngesehin parilaksana (solah maprawerti).

Ca. Katiwakin pamidanda nora antuk desa mejalaran paruman.

(2) Sang wusan makrama tan polih pahan sangkaning druwen desa/banjar, kabawos guak ngutang taluh.

(3) Desa/banjar wusan mapaweh pasayuban ring sang kanoroyang wah ring sane sampun pastika wusan makrama.

Palet 2

Indik Parajuru lan Dulu Désa

Pawos 12

(1) Desa Adat puniki keenterang olih Kelian Desa Adat.

(2) Banjar banjar kaenter antuk Kelian Banjar soang-soang.

(3) Sehanan Kelian Banjar keadegang melarapan antuk pamilihan sajeroning paruman soang-soang.

(4) Kelian Desa/Banjar kasanggra antuk prajuru, luwire:

Ha. Panyarikan pinaka juru surat.

Na. Patengen maka pangemong druwen desa/banjar.

Ca. Juru arah maka juru gumancang.

Ra. Pecalang maka patilik pasukertan desa/banjar.

Pawos 13.

Swadharman Prajuru, minakadi :

(1) Saking Iklian Desa/Banjar, luwire;

Ha. Ngenterang paruman desa/banjar manut dudonan.

Na. Ngenterang pemargin daging miwah pamutus pararem.

Ca. Ngeraksa saha midabdabin tata nyuluang seraja berana druwen desa/banjar.

Ra. Ngenterang saha nuntun krama, ngupadi pasukertan sekala – niskala.

Ka. Nuntun saha nyaksinin tata cara miwah sangaskaraning kahuripan babuat, sane ngilitang sulur pakulawargan.

Da. Nuntun saha ngenterang iwarga desa/banjar ngupadi ngelingang Sang Hyang Agama, kasucian palemahan, miwah tata cara ring ngangge setra.

Ta. Mawosin miwah nibakan pamutus marep ring wicaran warga desa.

Sa. Ngwakilin desa/banjar matemuang bawos ring saga sira ugi,

Wa. Lan sane sewosan sane wenten paiketania ring desa/banjar.

(2) Tata cara ngamargiyang swadharma ring ajeng, patut nganutin awig-awig, pasuara, dresta miwah pararem-pararem desa/banjar.

(3) Pemargi ring ajeng patut kasiarang ring paruman desa/banjar kapungkurnia.

(4) Kelian Desa/banjar sumakuta antuk pamutus paruman desa/banjar nganutin swadarmania soang-soang.

- (5) Swadharma prajuru sewosin ring ajeng wantah nyanggra nyerayanin Klihan desa/banjar manut dudonan.

Pawos 14

Olih-olihan prajuru kadi rig sor :

- (1) Majeng ring Klihan Desa/banjar, luwire:

Ha. Upon-upon tanah pecatu manut pararem.

Na. Angkepan duman ring desa/banjar.

Ca. Miwah sane sewosan manut pararem desa/banjar.

- (2) Olih - olihan prajuru panyanggra klihan desa/banjar manut kadi daging pararem desa/banjar manut dudonan.

Pawos 15

Kelian Desa/banjar ring sajeroning ngemargiang swadharmania patut mawirasa ring pamucuk desa pinaka manggalaning krama desa/banjar kadi ring sor:

- (1) Para angganian, madudonan luwire;

Ha. Sane wenang keanggehang:

- 1) Krama desa/banjar sawewidangan Sembung Sobangan.
- 2) Sampun manggeh dahan/teruna miwah tan keni pinyungan buduh.
- 3) Kautus/kasudi antuk prajuru sakehanian.

4) Kasudi antuk Klihan Desa semakwehnia 5 (limang) diri.

5) Satinut ring awig-awig, pasuara miwah dresta (adat).

Na. Manut bacakan wewilangan 41 (petang dasa langkung adiri),
luwire:

1) Prajuru Desa 11 (solas) diri.

2) Prajuru pasubakan 2 (kalih) diri.

3) Saking Karang Taruna 3 (tigang) diri.

4) Make duta soang-soang banjar 5 (limang) diri, miwah Duta
saking paetangan sewos malih 5 (limang) diri

Ca. Pamucuk puniki katuntun antuk Klihan Desa.

Ra. Kawusang, prade majalaran antuk:

1) Sangkaning line.

2) Wusan dados makrama desa/banjar.

3) Pinunas pastika antuk likita kerawuhang ring panuntun.

4) Tan nganutian keadegang dados Para angga pamucuk.

5) Kagentosin antuk sane nyudi dados duta.

Ka. Pioli-oli Para angga luwire:

1) Ngemedalang bawos, pikayunan, miwah mapaweh pemargi
ring Klihan Desa/banjar.

2) Pioli sewosan manut pararem desa/banjar.

(2) Tategenan lan swadharma pamucuk desa, luwire:

Ha. Tategenannia, minakadi:

- 1) Nyelehin pikayun panincapan utsahan desa saking krame.
- 2) Ngerencanayang bantang-bantang utsahan desa/banjar kapungkur.
- 3) Nureksa miwah nilikin pamargin pawangunan desa/banjar, saha kasukertan desa/banjar sewosan.

Na. Swadharmania, luwire :

- 1) Kaweang ngerencanayang pawah-wuh awig-awig.
- 2) Ngamedalang pasuara sane tan kawicaranan muwah ring paruman desa/banjar sajawaning durung wenten prasida kaanutang ring sapamargin awig-awig miwah dresta.
- 3) Kawenangang mastikayang pamuput sangkaning pamutus Klian desa marep ring wicaran warga desa/banjar.
- 4) Kawenangang nureksain spamargin Klian desa ngenterang desa miwah mapaweh pidabdab ngamargiang pasukertan desa/ banjar.

(3) Paruman pamucuk desa, madudonan luwire:

Ha. Kawentenang sanistane ngenem sasih, utawi padgata kala manut wiguna.

Na. Kamiletin antuk para angga, manut tata cara :

- 1) Pangarawuhe kapastikayang antuk likita, sane kawedarang antuk panuntun, tur prade tan rawuh tan pasangkan katiwakang pamatut ring desa/banjar, risampun saderengnia kamargiang arah-arahan.

- 2) Santukan pamatut katiwakang ring desa/banjar arep, ring anggan pamucuk sane cedok tan pakrana, pamatut inucap mawastu negepin yadiastun pangarawuhe wawu lintang ring atenga kehnia, pacang ngemargiang paparuman pamucuk krama desa.
- Ca. Pamutus paruman kautsahayang mangda gilik-saguluk, prade tan prasida suarane makehan sinanggeh pamutus, utawi maetang kalih pahtiga saking pangarawuh pamilet paruman.

Palet 3

Indik Kukul

Pawos 16

- (1) Kukul Desa manggeh piranti/sarana, tengerania mabuat ka anggen wangsit ring wawidangan desa Sembung Sobangan.
- (2) Kukul Desa tan wenang katepak yan tan manut kadi daging awig-awig puniki.
- (3) Tabuh tatepakan kukul desa/banjar pastika masewos-sewosan luwire :
- Ha. Tengeran upacara yadnya desa/banjar, nung tung.
- Na. Tengeran ngawit ngalaksanayang pakaryan kadi sampun kearahang/kesiaran, tabuh biasa atulud.
- Ca. Wenten sinalih tunggil -warga desa/banjar sane lina, akalentungan raris kaetut antuk tatuludan banban,

- Ra. Wenten sinalih tunggil warga desa/banjar lanang istri sane mawiwaha, kalih kalentungan banban, ring pabanjaran sang istri utawi sang mawak istri mawastu cihna kilangan daha.
- Ka. Tengeran wenten sinalih tunggil warga desa/banjar ngembasang rare tigang klentungan, ring banjar soang-soang sajawaning kembar, nem klentungan.
- Da. Tengeran wong desa/banjar kamalingan, bulus kalih tulud.
- Ta. Tengeran wong desa/banjar kapelegandang, bulus tigang tulud.
- Sa. Tengeran wenten wong desa/banjar kaamuk, kabegal, kabaak geni bhaya miwah baya pati sewosan, bulus tigang tulud.
- wa. Tengeran ngurungang ngamargiyang pakaryan desa/banjar limang klentungan banban.
- (4) Kukul desa/banjar tan wenang katepak, sajawaning mule wantah tengeran sane patut kamargiyang antuk wong desa/banjar sekadi kageni baya pati kang inucaping ajeng.
- (5) Kukul desa/banjar tan wenang katepak yan tan wenten babesen utawi pituduh Klian desa/banjar manut dudonan, sajawanning rikale pacang nengerang nganinin kapanca bhaya.
- (6) Sang pacang nepak kukul tan sangkaning pituduh, patut digelis atur supeksa ring Klian, saha ngokasang buat panepake kadi ring ajeng.
- (7) Sahanan kukul banjar ring sawidangan Desa Sembung Sobangan nyarengin katepak, prade wenten sinalih tunggil banjar nyihnayang wenten amuk kabhaya pati.
- (8) Suaran kukul tengerang, pakaryan, patut katedunin antuk ayahan manut ring daging dedaunan utawi kasiaran.
- (9) Suaran kukul tengerang bhaya, patut katedunin antuk ayahan lanang, inggian pangarep, pangele, rawuhing taruna, saha gegawan mapitulung anut rupan bhayane.

Palet 4

Indik Paruman

Pawos 17

- (1) Luwir paruman ring desa/banjar sawewidangan Sembung Sobangan :
 - Ha. Paruman desa/banjar
 - Na. Paruman Prajuru/pamucuk desa/banjar
 - Ca. Paruman sekaa-sekaa
- (2) Sahanan paruman sidha lumaksana, prade sampun katedunin antuk sang patut ngamiletin, maduluran suaran kulkul sajawaning paruman prajuru/pamucuk antuk arah-arah, saha abusana nyelempot, nganutin genah tur tan marep kamanggale antuk widhi-widhana cane, ngarcana Ida Bhatara Bhagawan Penyarikan.
- (3) Sahanan pamutus kautsahayang pisan mangda malarapan antuk gilik-saguluk, bilih tan prasidha suarane makehan utawi kalih pahtigan pamilet paruman sinanggeh pamutus.

Pawos 18

- (1) Paruman Desa Adat kawentenamng sanistane tigang sasih, sajawaning wenten sane mabuat kapikahyun antuk prajuru utawi kawidi antuk pah tigang dasa krama saha maduluran bantang babawossane kawicarayang.
- (2) Nangken paruman kadi ajeng, Klian Desa patut nyiarang pamargin ngenterang Desa, pamekas nganinin indik:

- Ha. Munjuk - lungsurin ayah ayah.
- Na. Pamargi panelas miwah sulur arta, brana druwen desa sewosan.
- Ca. Pamargin usaha-usaha desa sane mabuat.
- Ra. Sahananing wicara saha pamutus pamutusnia.
- Ka. Daging pasuara miwah pararem-pararem sane mabuat.
- Da. Rencana prajuru nganinin usaha kertin desa kapungkur.
- Ta. Miwah sane sewos-sewosan.
- (3) Sahanan siaran ring ajeng patut katitenin saha pamutus antuk pararem desa.
- (4) Pamutus paruman inucap sinanggeh sepat siku-siku sane patut kasungkemin saha katinutin antuk krama Desa Sembung Sobangan.

Pawos 19

- (1) Paruman prajuru kasulurang kadi ring sor, miwah paruman pamucuk kadi munggah ring pawos 15 (3) ring ajeng.
- (2) Paruman Prajuru kawentenang sanistane kalih sasih utawi manut wiguna.
- (3) Paruman inucap katuntun antuk Klian Desa.
- (4) Paruman Prajuru kawenangang wantah ngerincikan tata upaya ngemargiang usaha miwah pangerencana sakaluwirmia.
- (5) Sahanan rancangan san wenang kemargiyang, sadereng kapikukuhin antuk pamutus paruman desa/banjar manut dudonan.

- (6) Paruman wantah sinanggeh ngawisesa, saha wenang nyelem putihang tata pangenter Desa/Banjar manut dresta.

Palet 5

Indik Druwén Désa

Pawos 20

Luwir pedruwen Desa Sembung Sobangan :

- (1) Tanah Tegal, carik padruwen pura ring desa Adat.
- (2) Palaba inucap patut kaenterang antuk Klian Desa/banjar manut dudonan.
- (3) Pikolih utawi upon-upon laba pura inucap mangda kawerdiang tur pastika kawigunayang angge prabeya kasukertan desa/banjar sekala niskala.
- (4) Pelaba Pura inucap patut ilikitannia.
- (5) LPD (Lembaga Perkreditan Desa).

SARGAH PAPAT

SUKERTA TATA AGAMA

Palet 1

Indik Déwa Yadnya

Pawos 21

- (1) Palinggih panyiwian sawewidangan Desa Adat Sembung Sobangan, luire:

- Ha. Kahyangan Tiga.
- Na. Prajapati.
- Ca. Pura Dalem Surya/Pura Dalem Sekala.
- Ra. Pura Batur lan Pura Puseh, sane kaempon antuk Banjar Tegal.
- Ka. Pura Jemeng, Pura Sambu, sane kaempon antuk Banjar Anyar.
- Da. Pura Gaduh kaempon antuk Banjar Dangu Bingin.
- Ta. Pura Tapang kaempon antuk Banjar Pempatan.

☐ **Rahina piodalan soang - soang kahyangan inucap ring ajeng:**

- Ha. Pura Desa/Bale Agung, ri kala Soma Kliwon Kuningan.
- Na. Pura Dalem, ri kala Sukra paing wuku Dunggulan.
- Ca. Pura Puseh, ri kala Buda Kliwon Gumbeg
- Ra. Pura Prajapati, ri kala sukra paing wuku Dunggulan.
- Ka. Pura Dalem Surya/Pura Dalem Sekala, ri kala Buda Kliwon Sinta
- Da. Pura Batur, ri kala Anggara Kliwon Julungwangi.
- Ta. Pura Gaduh, ri kala Buda Kliwon Pahang
- Sa. Pura Tapang, ri kala Buda Wage Ukir
- Wa. Pura Jemeng, ri kala Buda Wage Langkir.
- La. Pura Sambu, ri kala Buda Umanis Medangsia.
- Ma. Pura Puseh, ri kala Anggara Kliwon Medangsia.

- (3) Panumayan patirtan sekadi ring ajeng ngenem sasih odalan alit miwah ngawarsa nadiang, sajawaning wenten parindik sios.
- (4) Pangaci ring Khayangan inucap, nista, madia, utama nganut kawentenana lan pararem krama Desa/Banjar.

Pawos 22

- (1) Ring pura inucap ring ajeng kawentenang Pamangku, serati lan sutri.
- (2) Ngadegang pemangku, serati lan sutri manut dudonan:
 - Ha. Nyanjan utawi nunas pawuwus.
 - Na. Ngawilang saking turunan (ngawaris).
 - Ca. Pilihan krama Desa/Banjar.
- (3) Sajeroning ngamargiang swadharma, pemangku kengin kasanggra olih penyade, manut kabuat desa/banjar.
- (4) Sane tan wenang angge pemangku/panyade serati lan sutri luwire:
 - Ha. Sane cedangga, minakadinia: peceng, bongol lan sapanunggalan ipun.
 - Na. Keni gering ila, ayan, edan lan sapanunggalan ipun.
 - Ca. Tan ngugonin daging agama.
- (5) Prabea upakara ngawintenang utawi adiksa widhi marep ring pamangku, panyade, serati lan sutri desa/banjar kamedalang olih Desa/banjar ma

nut pararem desa/banjar, ri kala kapatiania kapungkur, kasanggra antuk desa/banjar manut pararem rikala ngewangunang Pitra Yadnya.

Pawos 23

(1) Tategenan pamangku, panyade, serati lan sutri soang – soang kadi ring sor :

Ha. Pamangku lwire patut:

- 1) Nuntun ngenterang krama desa/banjar ngemanggehang kasucian kahyangan.
- 2) Mungguh tedun ring palinggih kahyangan panyiwian desa/banjar miwah ngiasin pralingga - pralingga manut pemastian prajuru.
- 3) Ngenter saha nibakang lan ngilenang Yadnya krama desa/banjar ring kahyangan panyiwian desa/banjar.

Na. Serati ring desa/banjar:

- 1) Ngenterang krama desa/banjar sajeroning midabdabin upakara Yadnya manut pamastian prajuru.
- 2) Panyanggra pamangku - pamangku sajeroning ngilenang upakara yadnya desa/banjar.
- 3) Miwah sane siosan ngawantu upakara yajnya desa/banjar.

Ca. Sutri tan mari ngamanggehang kasucian kahyangan desa/ banjar.

Pawos 24

(1) Mungging pikolih Pamangku, panyade, serati lan sutri kasulurang manut pararem desa/banjar.

- (2) Prade kahanan pamangku, lan sapanunggilania balu luh, kacihnan ngalap rabi malih, polih prabeya nyuciang raga saking desa/banjar manut pararem.

Pawos 25.

Pemangku, penyade, serati lan sutri kengin kagentosin manut sulur lan pararem desa/banjar.

Pawos 26

- (1) Rikala patirtan ring pura, krama lanang sane pedek tangkil ngaturang bakti patut mawastra, akampus, maumpal lan destar, prade ngaturang ayah kengin mapangangge adat sanistane maselempot/maambed wiadin masasenteng.
- (2) Rikala piodalan ring Kahyangan Tiga pangamong ayah sajeroning wali saking krama banjar manut pagilir.
- (3) Krama desa/banjar siosan, patut nyarengin ngaturang bakti ke Pura, kaetang antuk prajuru banjar nyane.
- (4) Rikala muspa mangda tragia makta serana sekar, kawangen lan sapanunggalan ipun.

Pawos 27

Rikala patoyan ring pamaksan/paibon, krama banjar siosan patut mapitulung, manut dadawuhan sang madruwe karya, miwah mapangangge adat sanistane maambed wiadin masesenteng.

Kasukertan Khayangan kadi ring sor:

(1) Tan kalugra ngeranjing ke Pura;

Ha. Sang cuntaka sangkaning sebel raga, kelayu sekaran, luwire;

- 1) Sebel kelayu sekaran selami roras rahina sane ngarepin, miwah tigang rahina sane siosan.
- 2) Sebel kandel sangkaning ngaraja, selami dereng mabersih.
- 3) Sebel madruwe oka selami akambuhan istrine miwah sang lanang jantos kepus udel.
- 4) Sebel sangkanin karuron selami roras rahina, utawi rawuh bersih.

(2) Sahanan jatma patita, luire;

Ha. Sang embas tan sumeken yayah ipun.

Na. Wong mobot kasanggaman tan sinangaskara.

Ca. Wong edan sadurung kalukat kaprayascita manut agama Hindhu.

Ra. Makta Sahanan barang sinanggeh ngaletihin manut agama, luwire ; tulang, getih, bok, sakaluwir wiwitan watangan, layudan Pitra Yadnya lan sapanunggalania.

Ka. Sato agung ngawit bawi ngelantur satone ngagengan, sajawaning kaanggen Yadnya utawi rikala mapepada.

(3) Prati laksana tan wenang ring pura, luire:

- Ha. Mamiuh miwah wak parusia siosan
- Na. Majaljal, bilih bilih yening jantos kanin utawi metu rah.
- Ca. Mabacin, manyuh, nyecepin, masanggama, miwah prawertine ala siosan.
- Ra. Mungguh tedun ring palinggih, sawawaning pituduh pamangku / prajuru

Palet 2

Indik Resi Yadnya

Pawos 29

- (1) Sang pacang mapodgala utawi madwijati, sawawaning nunas panugrahan ring song rumawos utawi Parisadha Hindhu Dharma lan Pemerintah, patut taler masadok ring Kelian Desa/Banjar.
- (2) Kelian inucap patut sareng nureksa nitenin mangda sulur miwah pamargine yakti-yakti manut kecaping agama Hindu, minakadinia tan cendangga saha kasusatyanyan mauripe, taler patut sareng nyaksinin pamargin upacara.
- (3) Prade rumasa kantung samer, prajuru inucap patut atur uning ring sang rumawos.
- (4) Sapuputnia Kelian inucap digelis nyiarang ring paruman banjar/desa sawidangan desa, indik bhiseka sang diniksan miwah pangloka palasraya manut panugrahan nabene.
- (5) Indik busana kasulinggihan manut pamutus Parisadha Hindhu Dharma.

(4) Prade paniwake ring ajeng rumasa durung tatas apadang, prajuru kengin nunasang ring sang rumawos.

(5) Pamutus tatiwak nabe sane sampan pastika, tan kawicaranan mwah.

Pawos 32

(1) Krama desa/banjar patut sareng ngawas nitenin katuntun olih prajuru, mangda sahanan yadnya sane kawentenang kaicen pamuput olih sulinggih utawi pinandita manut dudonan kadi kawenangan soang - soang manut dresta.

(2) Prade wenten ngalempasin, bilih bilih sane pastika nyumuka, prajuru wenang ngalangin utawi ngurungang yadnya inucap, prade kadurusang yadnya punika tan wenten kapatut.

(3) Sang ngalempasin utawi dustania, patut katiwakin pamidanda, olih prajuru, agung alit manut sudosania.

(4) Prade sang katiwakang amurug ring pamutus prajuru, wenang katunasang baos ring kerta desa sinenggeh anggen pamucuk desa tur tan kawicaranan mwah.

Palet 3

Indik Pitra Yadnya

Pawos 33

Pamargin pitra yadnya kadi ring sor;

(1) Pangupakaran sang lampus;

Ha. Mendem utawi ngaben asriakan, maka cihna pakingsan ring Ibu Pretiwi utawi makingsan ring geni antuk nutupang prabeya.

Na. Atiwa - tiwa utawi upacara pangabenan, tur sane kengin keabenang ri sampun ketus untu mungguhahang, miwah sane durung ketus ngawit saking yusa tigang sasih patut ngalungah.

(2) Upacara upakara pitra Yadnya riwusan keabenang kelanturang antuk nyekah utawi mamukur lan ngunggahang Dewa Hyang.

Pawos 34.

Swadharma lan tategenan pride wenten sinalih tunggil krama desa seda/lina, kadi ring sor:

(1) Sang kaduhkitan patut;

Ha. Nyadokang ring prajuru tur nunas kabebasan ring Klian Desa/Banjar.

Na. Ngaturang ring prajuru inucap napike kapendem utawi kaaben.

(2) Swadharmaning desa/banjar :

Ha. Prajuru maritatas pamargin sang kaduhkitan napi pacang kapendem, kaaben.

Na. Nepak kulkul manut pawos 19 (3) ring ajeng.

(3) Panyanggran banjar salanturnia:

Ha. Soang - soang krama nedunin patus manut pararem soang-soang banjar, asapunika taler prade laju keabenang.

- Na. Krama banjar lanang istri ngambil pakaryan manut dresta miwah ngarombo rikala pakutangan, saha abusana adat sanistane maselempot/masesenteng.
- Ca. Pamargin sawa miwah upakara mangda dabdad antar tan kengin ngarap watang lan masuara gora, prade murug keni pamidanda manut pararem.
- Ra. Prade murug kadi inucap ring ajeng angka (3). ca, risampun kasadokang ring prajuru, kawenang danda manut pararem.
- Ka. Yening sawane malelet, patut kawentenang pagebagan manut paetangan prajuru banjar soang - soang.

Pawos 35

Pengutangan Sawa ;

- Pa. Tan wenang mendem utawi nunjel sawa miwah awak-awakan sawa ring karang paumahan, kapatutang ring sema sana (setra).
- Na. Yen wenten pangguh sawa wiadin barang siosan sinanggeh leteh manut agama Hindu, ring wewidangan desa/banjar, saha tan wenten wong mariangken patut krama atur upeksa ring prajuru desa utawi guru wisesa, saha nyantos tur nyanggra sapituduh prajuru.

Pawos 36

- (1) Pidabdab ngeseng/mendem sawa kasulurang kadi ring sor puniki :

- Ha. Kapastika tan dados ngingepang bangbang genah pacang mendem Sawa.
- Na. Sawan rare wawu medal, patut kapendem pramangkin ring setra rare, tan ngetangang dewasa.
- Ca. Sajeroning babanjaran yen pacang mendem/ngeseng sawa lintang ring adiri arahina, ring setra tunggal, patut sane pinih tampek ring setra punika kamargiyang rihinan.
- Ra. Sajeroning arahina ring Bebanjaran, prade wenten pacang mendem sawa miwah ngaben, patut mendem kamargiyang rihin selanturnia wawu ngilenang pangabenan.
- Ka. Jadma padem nandang sakit ila, sawane patut kageseng ring tepi siringin teben setra.
- Da. Jadma padem salah/ngulah pati, sawane kepastikayang rihin antuk prajuru miwah sang amawang rat sadurunge dados kabakta kapakubon nyane.
- (2) Saluwir gagumuk ring setra kasinanggeh ngalikadin patut kagubar antuk sang madruwe sawa, prade murug gegumuk iucap kengin kagubar antuk krama kaenter antuk prajuru saha tan kawicaranan.

Pawos 37

- (1) Parade sawane pacang kapendem/kageseng ring tunon/setra boya wantah warga desa/banjar, patut nawur paleletehan sane kabawos pananjung batu/panukun setra, agung alit manut pararem.
- (2) Sapa sira ugi pacang mendem sawa utawi ngeseng, patut ring setra/tunon, tan dados ring karang paumahan, tegal carik lan siosan punika.

Pawos 38

- (1) Krama sane pacang atiwa-tiwa, patut nunas kabebasan ring Klian Desa / Banjar.
- (2) Prajuru inucap nitenin tur nuntun mangda jadma punika tinas tan nyantulin Pasukertan desa/banjar, tan wenten nyepungin kasucian desa/banjar, bilih bilih kahyangan.
- (3) Pidabdab nitenin tur nuntun kadi ring sor puniki :
Atiwa - tiwa tan kalugra, rikala : purnama, tilem, kala gotongan, semut sadulur, pasah, prawani, miwah piodalan ring kahyangan desa/banjar.

Palet 4

Indik Manusa Yadnya

Pawos 39.

- (1) Manusa Yadnya inggih punika upacara upacara dharmaning manusa ngawit sakeng patemoning kama petak kelawan kama bang, sajeroning garba ibiang ngantos lampus riwekas.
- (2) Upacara ring ajeng madudonin kadi ring sor:
 - Ha. Magedong gedongan, duk pangerempinian ibiang, manawi yusa bobotan 3-4 sasih.
 - Na. Duk sang rare embas
 - Ca. Kepus udel (puser)
 - Ra. Ngelepas aon risampune rare mayusa 12 rahina.
 - Ka. Akambuhan, rare mayusa 42 rahina.

Da. Tigang sesih utawi nyambutin.

Ta. Pawetuan risampun nem sasih.

Sa. Ngempugin rikala wawu tumbuh untu.

Wa. Makupak utawi maketus, upacara sesayut pangerti suara.

La. Mungguh daha teruna, ngembakin lanange ngeraja wadone.

Ma. Mapanes /matatah.

Ga. Mawiwaha.

Ba. Mawiten

- (3) Upacara upakara soang-soang ring ajeng nista, madia, utama nganutin sastra agama miwah catur dresta, maka buatan drestane, ngawinayang sima cara desa Sembung Sobangan.
- (4) Upacara pawintenan manut kadi pawos ring ajeng, miwah upacara pawiwahan manut pawos ring sor.

Palet 5

Indik Bhuta Yadnya

Pawos 40.

- (1) Bhuta yadnya ingih punika upacara upakara pabeyakalan ring pretiwi lan kahyangan, sarwa prani saha upacara babhutan.
- (2) Upacara pabeyakalan ring sarwa perani, luwire;
Ha. Tumpek pengorah/pengatag, nemoning saniscara Kliwon Wariga upacara majong ring sarwa tumuwuh sakeng Pura Melanting soang - soang banjar kadi ring ajeng.

- Na. Tumpek kandang/uye, nemoning saniscara Kliwon Uye, upacara majeng ring ingon-ingon.
- Ca. Upacara pekalan-kalan manusa anut wiguna, ketah babawos pabeyakalan.
- (3) Upacara upakara, pabeyakalan ring pretiwa lan kahyangan saha ring babhutan kawastaning macaru.
- (4) Pecaruan inucap ring ajeng nista, madia, utama manut wiguna kadi ring sor:
- Ha. Ekasata antuk ayam berumbun asiki
- Na. Pancasata
- Ca. Resi Gana
- Ra. Panca Kelud
- Ka. Panca sanak
- Da. Tawur Kesango.
- Ta. lan sapanunggalan ipun
- (5) Sewosing ajeng kawentenang upakara Yadnya sesa utawi masaiban nyabran wusan meratengan.

Pawos 41.

Upacara tawur kadi ring-sor :

- (1) Majeng ring Ida Bhatara patut:

Ha. Pangelong ping roras, nyejerang Ida ring pura Desa.

Na. Palelastian kapatutang:

- 1) Panglong ping telulas kesanga, melastiyang Ida lunga ke Segara.
- 2) Panglong ring empat belas, Ida bhatara nyejer ring Bale Agung.
- 3) Ring tileming kasanga nyoreang, melastiyang Ida bhatara kabejian ngelantur nodia upakara pacaruan.

Ca. Upakara kaetang antuk prajuru :

- 1) Pidaging upakara kakayarnin antuk banjar, kasanggra antuk prajuru.
- 2) Wali tatabuhan manut pagiliran banjar.

Ra. Sajawaning juru songsong, juru tedung, juru bandrang, prajuru banjar pamucuk pangarapan upakara miwah krama banjar sane ngamedalang tatabuhan, krama banjar sewosan patut ngiring melastiyang Ida Bhatara tur perade cedok tan kapiambeg keni pamidanda manut pararem krama soang - soang.

(2) Upakara tawur manut kadi ring sor:

Ha. Ring tileming kasanga kawastanin tawur kasanga ketah babawose ngerupuk/ nogtog pacang magpag rahina penyepian benjange.

Na. Pacaruan manut pararem:

- 1) Ring desa sanistania panca sata.
 - 2) Ring lebuah soang - soang krama masegeh agung manut arah-arah.
- (3) Ritepengan ngerupuk nyoreang, tan kengin langkungan ring tengah wengi riantukan dauh inucap maka panampih rahina benjangne inggih punika sampun rahina penyepian.
- (4) Tata cara ngarupuk mangda mamargi terepti katureksain antuk prajuru prade mamurug keni pamidanda manut pararem.

Pawos 42.

- (1) Upacara rahina Nyepi, nganutin catur pabratan sekadi ring sor:
- Ha. Amati geni, tan kengin meapi - api, sejawaning :
- 1) Sang madue rare durung tigang sasih ring genah rare inucap.
 - 2) Sang mapetin ring genah sang sungkan.
 - 3) Sang nuenang layon ring genah Sawa.
- Ha. Amati karya tan kengin wiadin kawenang nyambut karya.
- Ca. Amati lampah, tan kengin malelungayan, sajawaning patilik desa lan prajuru dinas, miwah sang polih uak - uakan utawi izin, antuk ilikita pastika saking guru wisesa.
- Ra. Amati lelanguan.

- (2) Prade amurug merata penyepian, keni pamidanda manut pararem sane kamariyang antuk petilik desa miwah Hansip lan Pecalang, dedosan inucap pinara tiga, soang - soang polih apah tigan desa/banjar, patilik lan Hansip.
- (3) Riwus rahina Nyepi kawostanin ngembak geni, mapiteges pangelukaran yoga semadi, kadulurin antuk ngaksama soang - soang krama desa/banjar, maka cihna pangawit icaka warsa anyar.

SARGAH LIMA

SUKERTA TATA PAWONGAN

Palet 1

Indik Pawiwahan

Pawos 43.

- (1) Pawiwahan inggih punika patemoning parusa lan predana, kadulurin antuk kayun suka cita, tur ngangken upasaksi sakala niskala.
- (2) Pamargin pawiwahan wenten tigang soroh, luwire :
 - Ha. Papadikan, kamanggalanin antuk pakrunan.
 - Na. Ngarorod, ngerangkat riyin wawu kakrunanayang.
 - Ca. Nyentona, risampun kategepin antuk upacara wiadin upacara Pamerasan.
- (3) Pawiwahan utawi alaki rabi ring desa puniki ngamanggehang Undang - Undang No. 1 warsa 1974 miwah Peraturan Pemerintah No. 9 warsa 1975 saha pasuaran Gubernur Bali nomor.

Sulur ngarorod kadi ring sor:

(1) Pidabdab sang pacang ngarorod patut;

Ha. Sampun manggeh daha teruna.

Ca. Sangkaning pada arsa/rna.

Na. Manut kecaping agama, tan gamia gumana.

Ra. Prade pangambile tiosan agama, kamenggala antuk banten penyambutan.

Ka. Asapunika taler prade pangambile asumundung angelangkahi karang hulu kasukserah ring tri manggalaning yadnya, sakewanten tan ngirangan pengaptin sang ngawarangan, ping ajeng sang manggeh purusa upacara patiwangi.

(2) Sapa sira, ugi pacang ngeurarangang pakulawargan patut masadok ring prajuru sane maritatas manut tan manut kakecap pawiwahan.

(3) Pemargin parorodane patut,

Ha. Krama sane nampi wong ngarorod patut pramangkin masadok ring Klian Banjar.

Na. Klian Banjar patut digelis supekta sang ngarorod, maka buatan meraktiaksayang manut utawi sangsih pamargine ring dresta.

Ca. Bilih Sampun manut, sang ngarorod miwah sang nampi polih pasubayan prajuru desa/banjar.

- Ra. Prade tan manut ring dresta, Klian Banjar patut digelis melasang, sang kanira-nira katetehan kawehin pasayuban ring Jeron Klian.
- Ka. Klian Banjar digelis ngutsahayang metahu wirang ring sang katetehan, prade doh dura desa genahnia usaha katumusang ring sang rumawos, luwire : polisi, camat ping ajeng Perbekel.
- Da. Sang mamiseka risampun kaparitatas wasta kalih umah nyane patut katundung saking wewidangan desa/banjar.
- Ta. Krama sane nampi patut katureksa manut ring pakertinnia prade saruron ring sang corah utawi nyarengin mamiseka wenang danda, agung alit manut pararem desa/banjar.

Pawos 45

Tata cara netes kadi ring sor:

- (1) Sang masaserep pacang netes parorodan, patut masadok tur nunas panuntun ring Klian Banjar.
- (2) Klian banjar patut :
 - Ha. Nureksa natasang saserep punika jati tan jatine patut pernah wirang ring sang ngarorod.
 - Na. Prade manut pengoloika jati pernah wirang digelis ngater saserep punika kagenah sang ngarorod.

(3) Sang masaserep patut tinut ring sapituduh Klian, nganinin tata netes parorodan luwire;

Ha. Ngerpanjang kaumah inucap tan langkungan ring tigang diri.

Na. Tan kengin makta gegawan sakaluwire.

Ca. Tan kengin matingkah kalih mabawos purusia/nantang.

(4) Sapanapake I Klian patut midabdabin mangda tata cara panetes sida trepti makabuatan mangde anake istri sane merangkat jati jati polih nerangang idepnia sangkaning lila, luwire:

Ha. Anake istri kagenahang ngeraga, tan dados anak sewosan nampekin, mangda tinas ring inange.

Na. I Klian nuntun nyulurang mangda sang maseserep polih mataken ring sang istri punika.

Ca. I Klian nyumakutayang, pamekas ring anake istri, yan pada rasa parorodane mangda sang masaserep matulak sangkanin pada rena juga.

(5) Pamutus I Klian dumugi lumaksana manut ring pamutus idep anake istri inucap, yan tan atur supeksa ring I Klian kangkat ring sang nampi mwah ring sang ngarorodang kadanda agung alit manut pararem.

(6) Yening piwal ring pidabdab alaki rabi inucaping ajeng, wenang kedanda manut pararem.

Pawos 46

- (1) Pawiwahan sang kapatut ring Desa Sembung Sobangan, risampun maka cihna :

Ha. Pawidi-widana, sanistana pabeyakalan.

Na. Kasaksinin antuk prajuru Desa lan Dinas

Ca. Kaungguhang sajarening pailikitan tur katumusang ring sang rumawos utawi camat.

- (2) Parabian kabawos tan patut, parade:

Ha. Natab upakara sakeng papaksan

Na. Nenten wenten saksi miwah ilikita.

Ca. Sinalih tunggil tan rawuh saha tan wenten ilikita.

Pawos 47

- (1) Prade wenten parilaksana ngawinayang cemer desa Sembung Sobangan, luwire:

Ha. Drati krama wiadin para dara utawi nyolong samara jantos kadapetan, kengin kasadokang antuk rabinia, ring prajuru.

Na. Mamitra ngalang utawi melaksana kadi pamikuren kemawon tan pawidi widana, wenang kasadokang antuk warga desa ring prajuru.

Ca. Daha bobot tan sangkaning pawiwahan, patut kasadokang ring prajuru olih kulawargania.

- (2) Risampun kapitatas antuk prajuru saha kabawosang ring para anggan pamucuk desa sane manggeh kerta Desa, malihne manut tri pramana pasadok inucap, wenang katiwakan pamidanda kadi ring sor :

- Ha. Sang drati krama utawi para dara patut ngawentenang panyapsap mala antuk pamrayascita manut sima mwah ngelasayang pamargi cemer inucap.
- Na. Sang mamitra ngalang, mangda mawiwaha tur ngarebu desa.
- Ca. Sang mobotang mangda ngambil kania/daha inucap antuk pawidi widana sajangkepnyane, prade tan manut nyakapang keni panyudamalan desa, saha pangupakara bobotan ngelantur, angupajiwen lan ngeweruhin embasan bonotan inucap jantos daha/teruna riwekas.
- (3) Prade pratingkahe ring ajeng jantos katunasang ring sang mawang rat, luwire polisi rawuh ke Pengadilan Negeri, mawastu sang lumaksana kasisipang, iwang manut pamutus pengadilan, sake wanten prade durung nyihnayang pangerajegang kasudamalan Desa manut panyisip angka (2) ring ajeng, risampun sang malaksana ngamargiyang pamutus saking Pengadilan inucap, taler pamuput panyisip ring desa, taler patut kamargiyang.
- (4) Prade tan manut ngamargiang penyisip kadi angka (3), wenang kapegatin suaran kulkul ring saurah-araih prati laksana suka – duka kulawarga sane ngundulang wong lumaksana cemer inucap.

Palet 2

Indik Nyapihan

Pawos 48.

- (1) Palas parabian riantukan salah sinunggil lampus, mapiteges balu.
- (2) Palas parabian malarapan wicara, praciha tan tumus suka citaning panunggalan idep sang alaki rabi, kapiteges nyapihan.
- (3) Palas parabian anut angka (2) riang ajeng, patut atur supeksa pailikitan ring sang rumawos/pengadilan, wastu tinas apadang pamutus kabawos nyapihan katumusang ring sang ngawiwenang utawi Camat, ngelantur prajuru nyiarang kawentenania ring desa.
- (4) Pamargin palas parabian mangda taler praside nganutin pawos 47 (3).

Pawos 49

Prade riwekas sang palas, kacihnan adung malih tur pacang mawiwaha, patut ngamargiang upakara pawiwahan manut pawos 48 (.1)

Pawos 50

Swadarmaning balu patut kadi ring sor :

- (1) Nguwasayang waris, pagunakayan, tan kengin ngadol, ngadeang, makidihang, sajawaning kabebasan saking pianak utawi kulawarga purusa pinih tampek prade pianake kantong alit - alit.

- (2) Kengin ngidih sentana prade sampun wenten paigum/pidabdab sadurung sinalih tunggil lampus saha kacumponin antuk kulawarge sinanggeh purusa.
- (3) Kawenangan mawiwahe malih, prade sampun polih paigum saking pianak daha/teruna utawi kulawarga purusa pinih tampek prade okane kantong alit - alit.

Palet 3

Indik Sentana

Pawos 51

- (1) Mungwing santana wenten kabawos prati sentane miwah sentana paperasan.
- (2) Prade wenten embasan bobotan tan sangkaning pawiwahan, mangda tan kabawos astra utawi babinjat patut kawentenang upakara pamrascita.
- (3) Prade ring pawiwahan tan wenten pratisentana, kedadosang ngidih sentana maka dasar paigum kulawarga saha upesaksi sekala niskala sane kabawos sentana paperasan.
- (4) Prade sinalih tunggil kraima ngamedalang oka, mangde sajeroning tigang rahina sampun kasadokang ring klian Banjar.
- (5) Klian Banjar patut :
 - Ha. Ngilikitayang sang embas inucap.
 - Na. Nyuarayang kulkul, prade lanang/istri tigang kelentungan, sakewenten prade kembar lanang istri, sami lanang utawi istri-istri, suaran kulkul nem kelentungan.

Ca. Prade rare kembar lanang istri karumasayang cihna kadurmangalan
desa Sembung Sobangan, patut kawentenang pamrayascita ring
desa utawi ring genah sane ngamedalang rare inucap.

Pawos 52

- (1) Mangde kapatut pangidih sentana punika patut kakaryaning upakara pamerasan makadi saksi sekala niskala.
- (2) Sapasira ugi krama sane pacang ngangkat sentana, patut ngawentenang pasadok ring prajuru, sekirangnia asasih sadereng pamerasan.
- (3) Selanturnia Klian patut nyiarang ring desa/Banjar, sapasira rumasa tan lila mangde nyadokan ring klian sanistane awuku sadereng kakaryaning upakara pamerasan.
- (4) Ring pakobet utawi tan cumpu ring pangangkatan inucap, Klian Desa/Banjar mangde digelis mawosin sahe micayang pamutus manut dresta miwah pararem.

Pawos 53

- (1) Sulus mangde kaangkat dados sentana, luwire :

Ha. Megama Hindu.

Na. Yusane alitan ring sang ngangkat,

Ca. Ping ajeng kulawarga saking purusa, prade tan wenten kengin saking predana, taler tan wenten kadadosan saking anak seos kemawon mangde patunggilan soroh.

Ra. Ngangkat sentana kengin lintang adiri, yadiastun lanang wiadin istri.

(2) Pengangkatan sentana utawi pamerasan sane sinangeh kapatut :

Ha. Risampun mawidhi/Widana.

Na. Kasaksinan antuk Prajuru Desa lan Dinas.

Ca. Ngelantur Klian Nyiarang ring Paruman Desa/ Banjar.

Palet 4

Indik Warisan

Pawos 54

(1) Warisan Inggih punika tatamian arta brana miwah ayah-ayahan saha sekala niskala tatinggalan pawaris utawi sang lampus.

(2) Sane kabawos warisan, luwire :

Ha. Due tengah, minekadi karang paumahan sanggah / Mrajan.

Na. Utang piutang,

ca. Miwah ayah-ayahan Desa/Banjar.

(3) Wawu kengin kabawos wenten warisan, prade :

Ha. Wenten pawaris utawi sang mapiturun.

Na. Wenten ahli waris utawi katurunania.

Ca. Wenten arta brana warisan/tategenan utawi ayah-ayahan makadi warisan.

Pawos 55

(1) Sang sinanggeh ahli waris, luwire :

Ha. Prati sentana saking purusa.

Na. Santana rajeng.

Ca. Santana pamerasan.

(2) Prade tan wenten ahli waris kadi angka : (1) ring ajeng, kedadadosan ahli waris :

Ha. Turunan purusa Rajeg, mekadi rerama misan mindon.

Na. Turunan purusa kesamping, luwire keponakan misan mindon.

Ca. Taler tan wenten kadi ring ajeng wawu kengin kulawarga pradana.

Pawos 56

Swadharmaning ahli waris, luwire :

(1) Nerima miwah nguasayang tatamian saking pawaris, mekadi ngerempon merajan/pura dadia/pura parhyangan miwah ngupakara ayah ayah saking pewaris.

(2) Pitra Yadnya utawi ngabenang pewaris.

(3) Nawurin utang - utang pewaris.

Pawos 57

Pemargi pangepahan warisan mekadi ring sor:

(1) Risampun kamargiyang upakara pitra yadnya saha-utang nyane buntas katawur.

(2) Para ahli waris polih duman pada, sajawaning karang ayahan desa kakuasayang antuk ahli waris kayang kapungkur.

(3) Ahli waris prasida tan polih pahan, prade:

Ha. Sentana rajeg kesah mawiwaha lan sentana nyeburin, ketah bawos ninggal kadaton.

Na. Alpaka guru, upami merihaken maye pati pewaris.

Ca. Ninggal swadharma lan tategenan antuk matilar guru swadiyaya /agama.

(4) Prade boya ahli waris kengin muponin arta warisan, luwire;

Ha. Jatma luh sane durung kesah mawiwaha utawi alpaka guru, prade jatma luh inucap ngembasang oka tan sangkaning pawiwahan okanne inucap tan kengin ngewaris arta berana, sajawaning pikolih pamupon biange kemawon.

Na. Balu luh utawi muani nyeburin

Ca. Mulih daha utawi kaumah wedan.

(5) Paweweh pawaris rikala maurip kadi ring sor :

Ha. Jiwa dana, tadtadan / bekel ring pianake sane kesah mawiwaha.

Na. Pangupa jiwa, paweweh padgatakala pawaris marupa muponin kemawon.

Ca. Pedum pamong / pedum raksa, pahan pawaris padgatakala jantos pedum pastika arta warisan arep ring ahli waris.

- (1) Prade ahli waris langkung ring adiri patut:
 - Ha. Kapigumang pamargi pengepahan warisan.
 - Na. Prade tan prasidha pigum, kengin nunas pamatut prajuru desa/banjar.
 - Ca. Prade taler tan wenten cumpu ring pamuput prajuru dados katumusang ring sang rumawos utawi Pengadilan.

- (2) Prede wenten Karang kaputungan, prajuru desa wenang mawosin tur nureksa sila – sila pewaris, tur ngepahang ring:
 - Ha. Ahli waris saking purusa.
 - Na. Turunan kesamping, prade tan wenten turunan rajeg.
 - Ca. Prade taler tan wenten anut angka 2 ring ajeng kengin katibakang ring lintihan pradana.
 - Ra. Taler tan wenten kadi ajeng dados katibakeng ring krama patunggilan/wed desa Sembung Sobangan sane megama Hindhu.
 - Ka. Pahan karang inucap tan dados kapicayang ring krama sane sampun nanggap karang ayahan desa.

- (3) Prade panureksa prajuru desa sampun kamargiyang kadi ring ajeng, selanturnia matigang sasih/pasangkepan banjar, taler pawaris nenten sumanggup ngayahang karang desa inucap, patut karang ayahan kacabut antuk desa, kamawos desa patut marateka pawaris sane pecak ngamong karang inucap sepatutnia.

SARGAH NEM

SUKERTA TATA PALEMAHAN

Palet 1

Indik Dusta lan Bhaya

Pawos 59

- (1) Bacakan panca bhaya, luwire:
 - Ha. Jiwa bhaya, upami kabaak, tan sewosan punika.
 - Na. Arta bhaya, upami kamalingan.
 - Ca. Geni bhaya, upami umah puwun, lan sapanunggalan punika.
 - Ra. Palegandangan.
 - Ka. Dura cara ring agama, upami nganistayang agama.
- (2) Sehanan warga desa/banjar, patut digelis atur uning ring prajuru prade uning ring kawentenan jatma melaksana panca bhaya.
- (3) Prade dahat sarat kawentenania, kengin nepak kulkul pamitulung anut rupan bhayane.

Pawos 60

Tata caraning masaserep, kadi ring sor:

- (1) Warga desa/banjar sane kaicalan prade pacang masaserep, patut nunas kabebasan miwah panuntun Klian desa/Banjar.
- (2) Prade genahe masaserep kadura desa patut nunas kabebasan utawi uak – uakan saking Klian Desa/Banjar genahe masaserep inucap.

- (3) Klian Desa/Banjar inucap ngicen panuntun mangda tata cara masaserep manut ring dresta.
- (4) Sahanan warga desa/banjar prade polih nuduk barang saka wire ring wewidangan pura utawi bale desa/banjar, patut atur uning ring Klian Desa/Banjar.
- (5) Klian Desa/Banjar patut nyiarang barang dudukane punika mangda sang madruwe mawantun ngawaliang barangnia, turmaning sang mariangken mangda mrasidayang nyihnayang barang inucap mula wantah padruwenia.
- (6) Prade barang sane ical ring pawidangan sekadi angka (4) ring ajeng tan prasida kapanggih, sang kaicalan kengin nunasang ring parajuru mangda ngecorin krama desa/banjar utawi sinalih tunggil krama sane kadalih.

Palet 2

Indik Karang, Tegal, lan Carik

Pawos 61

Karang

- (1) Sahanan karang paumahan patut:
 - Ha. Pastika wenten pawatesnyane.
 - Na. Mapamedalang karurung.
- (2) Kelihan Desa/banjar patut ngutsahayang mangda sami pekarangan warga desa/banjar kadi inucaping ring ajeng.

- (3) Sehanan krame patut ngewatesin karangnia soang-soang jantos sida trepti nyatur desa.
- (4) Wates karang sane mejapitan patut kategen antuk krama sane mauluan kawates inucap manut dresta, sane sampun madesa/mebanjar adat.
- (5) Telajakan karang soang-soang krame patut kapiare antuk krama sane nuwenang karangnyane.
- (6) Margi - margi ring arepan karang krama patut kapiare antuk - krama desa/ banjar saha kasarengin antuk krama soang-soeng sane nelajakin karang nyane, miwah tan wenang ngembahang toya pangutangan kekarang penyanding.

Palet 3

Pepayonan

Pawos 62

- (1) Taru miwah woh-wohan sane maurip ring wates, kadruwe olih krama sane negen karang inucap.
- (2) Tanem tuwuh sakaluire tan wenang ngungkilin utawi ngrobin miwah ngawinang pocol krama penyanding.
- (3) Prade wenten kadi angka (2) ring ajeng wenang, kasepat gantungin saha katatas olih krama sane madue tanem tuwuh sane mayanin inucap, antuk tata cara :

- Ha. Krama madrue tanem tuwuh, mayanin panyanding patut atur supeksa ring prajuru mangda nyaksinin rikala notor, ngarebah tarune.
- Na. Atur supeksa ring prajuru nunas tempo panumaya pacang nelasin.
- Ca. Sadurung lintang tempo, prade tanem tuwuh sane mayanin punika rubuh tanpa jamuga manawi antuk linuh, angin baret lan sekancanin sang madruwe luput sakeng kaiwangan.
- Ra. Tanem tuwuh sane rubuh punika wenang katawah antuk sang keni bhaya.
- (4) Saluwiring tanem tuwuh nungkulin utawi mayanin pangadinia panyepat gantunge wenang maren utawi ngajeroang 2,5 meter saking wates.
- (5) Saluwiring tanem tuwuh krama sane mayanin patut negen prabeya prade sampun kasadokang ring prajuru prade wiakti mayanin tur tanem tuwuh inucap kabukti antuk sang keni baya.
- (6) Prade tanem tuwuh sinanggeh mayenin kaanteg antuk sang katetehan patut :
- Ha. Kepademan antuk sang madue taru inucap.
- Na. Prajuru mastikayang taru inucap pacang mademang, prade sang madue tan nginutin penganteg sang katetehan.
- (7) Tanem tuwuh sane mentik ring wates, prade ngawetuang wicara patut kapastikayang antuk prajuru patut kepademang asiki katur kadesa utawi banjar.

Pawos 63

- (1) Ngawit nanem pepayonan patut adepa agung (2,5 m) ngajeroang saking wates.
- (2) Tan kalugra wit taru mentik sajeroning wates, ngelintangin wates bilih-bilih mawetu mayanin penyanding.
- (3) Sang keni pamidanda nyangaskara saha prabeya manut pararem wawangunan sane karubuhin :
 - Ha. Sang nruenang wit sinanggeh mayanin, prade pungkak ngerubuhin wewangunan jatma tios.
 - Na. Sang notor, munggul utawi ngerebah taru pungkak ngerubuhin wawangunan jatma tios.
 - Ca. Panyangaskara inucap sanistane prayascita tur mecikang sane karusak.

Palet 4

Wewalungan

pawos 64

- (1) Tan wenang ngelumbar wewalungan ring pekarangan, bilih - bilih jantos ngerusak pekarangan penyanding, miwah khayangan.
- (2) Sehanan warga desa / banjar sane mamelihara wewalungan patut sayage nitenin negul/ngelogor, mangda ubuh-ubuhania tan wenten ngerusak kaangka (1) ring ajeng, bilih - bilih sampunang jantos ngeranjing ngaletihin khayangan.
- (3) Prade wenten wewalungan ngeleb saha ngeranjingin pakarangan sewosan, sang madruwe karang kengin malungguhang ring sang madue wewalungan, bilih-bilih yang jantos nga

winang karusakan mangde numusang bawos ring prajuru, raris prajuru wenang niwakang pamidanda ring sang madruwe wewalungan sane ngerusak, agung alit manut dosane.

- (4) Bilih ring asasih jantos ping tiga sampun malungguhang, wewalungan wenang ketaban, tur sang naban atur uning ring prajuru semaliha wewalungan tatabanan inucap patut kapiara olih sang naban jantos katebus antuk sang nruenang.
- (5) Sang nruenang patut nebus kadulurin antuk denda manut karusakan miwah prabeaya miara wewalungan anut pangeloika prajuru.
- (6) Bilih ring asasih jantos ping tiga mataban kadi ring ajeng, wewalungan wenang kaleleb tan kawenang tinebusan malih pamargin panabanan malarapan antuk kabebasan prajuru.

Pawos 65

- (1) Prade wenten wewalungan ngeleb tur ngeranjing kakhayangan sane madruwe wewalungan inucap kasisipan antuk danda prabia ring upakara pamarisuda, manut agama lan pararem.
- (2) Prade wenten wewalungan keni palungguhan jantos kataban, nanging tan wenten sane ngangkenin masue tigang rahina, patut wewalungan inucap kaaturang ring prajuru desa/banjar.
- (3) Yening wewalungan inucap padem tan sangkaning kakardinin sajeroning kandang tatabanan, sang naban tan polih prabia panabanan, semalihnia

sang madruwe wewalungan polih pangentos pangargan wewalungania
sane padem inucap.

- (4) Tata cara malungguhang utawi naban miwah nebas walungan majalaran pituduh prajuru desa/banjar.

Palet 5

Wewangunan

Pawos 66

- (1) Wewangunan patut :

Ha. Ngangge gegulak asta kosala kosali, sanistane manut patitis niskala.

Na. Tan yogya nyayubin pewangunan penyanding.

- (2) Prade nyantos nyayubin, risampun kasadokang ring prajuru keni pamidanda manut pararem.

- (3) Prade wewangunan tepi siringing wates, patut kawentenang paigum ring pangardinia tur kasadokang ring prajuru desa/banjar prade mamurug pet riwekas kawarah antuk pangardinia, wenang wewangunan inucap kagubar antuk sang madruwe saha tan polih prabia kapocolan.

- (4) Prade wewangunan kadi (3) ring ajeng sampun polih paigum ring pangardinia kengin ngangge abangan tur toyan cacapania tiba kajero.

- (5) Krama sane pacang ngawangun patut masadok ring prajuru, sadurunge polih ilikita patra (uak- uakan) durung kalugrayang ngewangun.

- (3) Banjar patut madarsana antuk rasa prama tulung ring sang makarya, kawangon tan maren miteketang kasusatian krama ring banjar.
- (4) Bilih karyane abot, banjar wenang ngarereh pitulung ring banjar penyanding.
- (5) Pakaryan sane patut kasukserah ring banjar, luwire:
- Ha. Ngupakara sawo utawi pitra Yadnya.
- Na. Nangiang upacara dewa ring pakubon soang-soang.
- Ca. Upacara Manusa Yadnya.

Palet 8

Indik Tulung Sinulung

Pawos 69

- (1) Prade krama desa/banjar ngawentenang pasubaya sajeroning pangupa jiwa, luwire :
- Ha. Antuk nanggap tanah tegal/carik wiadin madunungan ngaryanin pakubon ring tanah desa sewosan.
- Na. Utawi makadasan ingon-ingon, mangde prasida nganutin kawentenan uger-uger Pemerintah, bilih mabuat pisan patut kawentenang ilikita lan panyaksi prajuru desa lan dinas, pangaptine mangde tan ngawinayang pocol salah sinunggil krama, tur jati-jati pada arsa majalaran parama tulung.

- (2) Pariindik pikolih padana punia sane kadrue antuk desa/banjar pinaka kas sane kamargiang/kaputranang, mangda nganutin taler uger-uger Pemerintah, sane kabawos koperasi taraning banjar, mangda tan jantos ngawentenang wicara ring pabanjaran, mawiwit tan ngawaliang saselangan krama manut panemaya.

SARGAH PITU

WICARA LAN PAMIDANDA

Palet 1

Indik Wicara

Pawos 70.

- (1) Sane wenang mawosin makadi muputang wicara ring desa, luwire :
Ha. Klian banjar prade sang mawicara patunggilan babanjaran.
Na. Kelian desa, prade sang mawicara mebinayan pabanjaran.
- (2) Prade sang mawicara tan wenten cumpu ring tata saran Klian banjar mawosin, kengin nunas babandingan ring klian desa.
- (3) Prade taler tan wenten cumpu ring pamatut Klian desa, kengin katunasang tatimbang ring Kerta Desa maka anggen pamucuk desa, saha pamuputnia tan kawicaranan mwah.
- (4) Pamuput ring desa pet tan kacumponin, kasukserah ring sang mawicara numusang ring guru wisesa utawi sang rumawos utawi pengadilan.

Pawos 71

- (1) Sahanan wicara sane mawiwit kacorahan sakaluwire miwah sinanggeh nungkasin daging awig-awig, pasuare lan pararem desa/banjar, patut pramangkin kabawosin tan nyantos pasadok.
- (2) Sejaba wicara kadi ring ajeng patut nyantosang pasadok sang nunas bawos.
- (3) Panepas desa makadi swadarmaning pamucuk desa mapaweh tatimbang, mangda pastika nyantenang iwang patut melarapan tri pramana, luwire : saksi, ilikita, bukti, saha tan maren nepek ring dresta.
- (4) Sehanan pamuput sane katiwakang kadi ajeng tan wenten piwal ring awig-awig, dresta utawi pararem, melarapan dharma tula.

Palet 2

Indik Pamidanda

Pawos 72.

- (1) Desa/banjar wenang niwakang pamidanda ring warga sane sisip.
- (2) Paniwak inucap kemargiang antuk Klian Desa/banjar, nunggal-nunggal manut sekadi ring sor :
Ha. Kaping ajeng kapakelingin mangda muntasang tategenan utang utawi kaiwangan sakaluire.
Na. Risampun kapatinget jantos makudang sangkepan:

- 1) Hutang harta brana kengin kamargiang rampagan, manut tata cara,
 - 2) Ring kaiwangan tiosin harta brana, kapakelingin malih pisan.
- Ca. Risampun angka 2 ring ajeng kamargiang, taler sang sisip tan wenten usaha ginentosin solah maprawerti, wenang krama inucap kapegatin suaran kulkul, mawastu kasepekang banjar/desa.
- (3) Agung alit pamidanda masor kulkul, mawastu kasepekang banjar/desa ngupadi dharma kawelas arsan, pinih ajeng makabuatan ngewantunang kasudamalan desa, boya mapikenoh, mingkalihang pamidanda.
- (4) Bacakan pamidanda, luwire :
- Ha. Danda arta miwah panikel-panikelnia jantos ngarampang.
- Na. Kapakelingang.
- Ca. Pangampura/panyuaka.
- ra. Upakara panyangaskara.
- Ka. Kasepekang makrama.
- (5) Jinah utawi arta brana pamidanda ngaranjing dados druwen desa/ banjar.

Pawos 73.

- (1) Rikala pawanengan ngamedalang jinah papeson 9 dadandan utawi dedosan, yening meled keni padandan nikel, asapunika taler yan tan ngaturang hasil-hasil tanah desa.

(2) Risampun keni nikel, mawaneng malih asangkepan taler tan katawur wenang karampag manut kadi ring sor :

Ha. Kemargiang antuk pajuru kamiletin antuk krama akehe tigang diri.

Na. Tan ngarampag barang sane patut inggilang manut agama miwah ngemadenang pangupa jiwaan sang karampag, luwire :

1) Sane tan kawenangang :

Ha) Barang sane anggen ngerateng utawi anggen nincapang pangupa jiwa, minakadi sarana ke sawah/tegal.

Na) Sarana keanggen ngemargiang upacara agama.

2) Kawenangang ngerampag :

Ha) Wewalungan suku pat/suku kalih.

Na) Uparenggan paumahan, makadi meja, kursi, lemari, lan sapanunggilanipun.

Ca) Papayonan utawi tanem tuwuh.

Ca. Klian miteketang mangda batang sane pacang karampag kacihnain antuk sawen gumentos polih panumbas rampagan samael-maelnyane.

Ra. Pikolih piodalan rerampagan malih katulakang prade langkung ring utang sang karampag.

Ka. Sang karampag tan dados ngalangi pamargin parampagan saha tan margin sareng nyaksinin parampagane.

(3) Prade taler jatma karampag tan manut turmaning tan wenten usaha pacang nawur, lan sapratingkah amandal tiosan, risampun kakertain antuk pamucuk desa sane maangga kerta desa, mawastu jatma inucap nguwak pasubaya sajeroning awig-awig, matemahan kawegang krama desa ngamenengin utawi tan ngalugrahin suaran kulkul, katah bawos kasepekang.

(4) Sang kasepekang kengin kawaliang makrama desa/banjar risampun :

Ha. Nunas geng pangampura / nyuaka ring krama banjar/desa riantuka nguak/piwal ring pasubaya sane kararemin pecak.

Na. Nawur pangragan tan ngautin awig-awig sane macihne arta brana duk pacang kasepekang/kerarianang.

SARGAH KUTUS

NGUWAH-UWUHIN AWIG-AWIG

Pawos 74

- (1) Nguwah – nguwuhin awig-awig puniki kdasar in antuk pararem desa kamargiang antuk pamucuk desa Sembung Sobangan.
- (2) Pengapti wah wuh inucap mangda kdasar in antuk pakarsan krama desa.
- (3) Pemutus bawos mangda kdasar in antuk gilik-saguluk utawi pararem.

Pawos 75.

Paparuman indik nguwah-nguwuh awig-awig sekadi ajeng, kengin kamedalang antuk klian Banjar, Klian Desa, yadiastun niri dinisawah sinarengan.

SARGAH SIYA

SAMĀPTA

Pawos 76

Awig-awig puniki kawastanin awig-awig Desa Sembung Sobangan, Awig-awig punika kemargiang ngawit kararemin.

Pawos 77

- (1) Sakaluwiring sane wenten saderegnia patut kaanutang ring sadaging awig-awig puniki.
- (2) Sakaluiring sane durung kabawos sajeroning awig-awig puniki patut tur kamargiang manut tata cara sane sampun ketah mamargi kadulurin antuk pararem-pararem.

Pawos 78

- (1) Awig-awig punika: kararemin duk rahina Saniscara Keliwon wuku Landep sasih kaenem, Icaka 1906 tanggal masehi 24 Nopember 1984.
- (2) Ring pure desa/bale Agung Sembung Sobangan.

- (3) Awig-awig puniki malih kaparipurnayang lan sampun kasobyahang, kapiteges lan kacumpuang duk Paruman Agung Desa Adat Sembung Sobangan ring rahina Wuku pinanggal masehi 2012, kalinggatanganin antuk Bandesa kapikukuh antuk Palunggung Bupati Cakraning Jagat Badung saha kajikitayang utawi kacatet ring Pemerintah Kabupaten Badung.
- (4) Klian Desa/Bandesa Adat kala ngemargiang sedaging awig-awig miwah utsahan Desa, patut tan maren :
- Ha. Saeloan utawi mawirasa ring sahanan prayoga sane taler ngawiwenang wong desane, upami Perbekel miwah Pekaseh.
- Na. Ngawentenang galah pengala Desa mangda wong desane polih ngupadi pangupajiwa, nincapang pangeweruh miwah usaha neri-neri swosan.
- (5) Awig-Awig puniki kalingga tanganin antuk Klian Desa Kasarengin olih Klian-klian banjar, saha kesaksinin antuk Klian-klian dinas Sawewidangan Desa Sembung Sobangan miwah Perbekel Desa Sembung.
- (6) Luwir sang ngelingga tanganin :

Prajuru Desa/Banjar

Klihan Desa Adat Sembung Sobangan


I Nyoman Nuada.

Kelian Adat Br. Pempatan,

Kelian Adat Br. Tegal,



I Made Sukarma.

I Made Kahus

Kelian Adat Br. Dangin Bingin,

Kelian Adat Br. Anyar ,




I Gusti Ngurah Nita.

I Ketut Wardana.

Manggala dinas maka saksi

Camat Mengwi,

Perbekel Desa Sembung,



Gede Suwarcita, SE.



Imade Kartana, SE.

Bupati Badung,



Anak Agung Gde Agung.